



# ATASSUT INATSIARTUNI

---

**ATASSUT**

**UKA 2013/20-1**

**Gerhardt Petersen**

**24.10.13**

**Inatsisartut taakkulu allaffissornikkut immikkoortuisa illussaannik nappaanissamut Siulittaasoqarfiup pilersaarussiaanut Inatsisartut tapersiinissaannut alajangiiffigisassatut siunnersuut.**

(Inatsisartut Siulittaasoqarfiat)

Inatsisartut Siulittaasoqarfianit matumani siunnersuutigineqarpoq Inatsisartut taakkulu allaffissornikkut immikkoortuisa illussaannik nappaanissamut Siulittaasoqarfiup pilersaarussiaanut Inatsisartut tapersiissasut.

Siunnersuut sukumiisorujussuarmik tunngavilersugaasoq ATASSUT-mit tamakkiisumik ilalerparput ullumikkummi Inatsisartuni ilaasortat, Inatsisartoqarfirmi atorfilittat, Inatsisartuni partiit atorfilittaat peqqinnanneqisumik avatangiiseqarlutik sulisariaqartarnerat inuttut peqqissutsimut sunniuteqarnerluttartoq tamatta maaniittugut uppersarsinnaannguatsiarparput.

Tamatuma saniatigut Inatsisartut ataatsimiittarfimmini ataatsimiikkaangamik eqqissillutik sulisinnaaneq ajornerat arajutsineqarsinnaanngilaq, ini ataatsimiittarfik annertuumik tattoqilliorfiuvoq, Inatsisartuni ilaasortat anersaartorfissaqarpiaratik tattoqisaateqalutik sulisarput, atorfilittat Inatsisartut ataatsimiinneranni najuuttartut inissakilliorlutik tusarnaariat akornanni pappiararsorniaatigalutik malinnaaniarsarisarput, tusarnaariat eqqissillutik akornusersorneqaratik tusarnaarsinnaaneq ajorput inersuaaraq taanna ataatsimiinnerup nalaani angallaffiusaqimmat.

Sanaartortoqarnissaanut pilersaarutit sanaartugassat aningaasalersorneqarnissaannut pilersaarutit aammalu Inatsisartut Siulittaasoqarfiat sinnerlugu saqqummiisup tunngaviersuutai ersareqimmata qalleqqiinnikkaluarluta ATASSUT-mit inassutigissavarput siunnersuut akuersaarneqassasoq,



## ATASSUT INATSIARTUNI

---

taamaattorli pisariaqartinneqassappat misissoqqissaarneqarnissaa, inassutigissavarput Inatsisartut Aningaasaqarnermut Akileraartarnermullu Ataatsimiititaliaanut ingerlateqqinneqassasoq.